

Na osnovu člana 35. i člana 131. stav 3. Statuta Općine Velika Kladuša („Službeni glasnik Općine Velika Kladuša“, broj: 9/07), člana 88. stav 1. i člana 96. stav 1. tačka 1. Poslovnika Općinskog vijeća Općine Velika Kladuša („Službeni glasnik Općine Velika Kladuša“, broj: 9/07), nakon provedene rasprave, rukovođen ozbiljnošću aktuelnog stanja u i oko Agrokomerca, d.d. svjesni posljedica koje Zaključak Općinskog suda u Velikoj Kladuši, broj: 023-0-IP-06-000081, od 17.04.2009. godine, o prodaji nekretnina Agrokomerca, d.d. proizvodi po kršenje prava dioničara i uništavanje daljnje perspektive Agrokomerca, d.d. te svjesni ukupnog značaja Agrokomerca, d.d. za Veliku Kladušu, USK, Federaciju BiH i šire i dosadašnjeg odnosa viših nivoa vlasti u BiH prema rješavanju statusa i revitalizaciji ovog razvojnog potencijala, Općinsko vijeće Općine Velika Kladuša na Prvoj vanrednoj sjednici, održanoj dana 04.05.2009. godine, donijelo je slijedeće :

Z A K L J U Č K E

I

1. Pozivamo Općinski sud u Velikoj Kladuši da obustavi izvršenje svoga Zaključka, broj:023-0-IP-06-000081, od 17.04.2009. godine, kojim se za dan 21.05.2009. godine određuje prvo ročište za prodaju nekretnina Agrokomerca, d.d. Velika Kladuša, jer se time izaziva kršenje prava dioničara Agrokomerca, d.d. čiju zaštitu su isti zatražili u četiri tužbe koje su podnijeli kod Suda za ljudska prava u Strazburu i sudova u BiH i proizvodi nesagledive posljedice po daljnju perspektivu i budućnost Agrokomerca, d.d. Velika Kladuša.

2. Zahtijevamo od Vlade Federacije BiH, kao oficijelnog titulara državnog kapitala u Agrokomercu, d.d. i jedinog nosioca upravljanja i rukovođenja Agrokomercem, d.d. da izmiri obaveze koje su predmet navedenog Zaključka Općinskog suda u Velikoj Kladuši, kako bi spriječili kršenje prava dioničara i nesagledive posljedice po perspektivu i budućnost Agrokomerca, d.d. koje mogu nastupiti prodajom nekretnina Agrokomerca, d.d. koje tretira ovaj Zaključak.

3. Pozivamo Sud BiH da se hitno očituje o privremenoj mjeri zabrane svakog oblika prodaje i otuđivanja imovine Agrokomerca, d.d. Velika

Kladuša koju su predložili dioničari u svojoj tužbi od 26.10.2005. godine.

4. S ciljem zaštite preostale imovine Agrokomerca i stavljanja Agrokomerca, d.d. u funkciju razvoja i napretka Velike Kladuše, USK-a, Federacije BiH i šire, tražimo od Vlade Federacije BiH da prava po osnovu upravljanja državnim kapitalom u Agrokomercu, d.d. privremeno – do izricanja pravomoćnih presuda Suda za ljudska prava u Strazburu, Suda BiH i Općinskog suda u Velikoj Kladuši po tužbama dioničara Agrokomerca, prenese na Općinu Velika Kladuša, a međusobna prava i obaveze da se regulišu Odlukom ili posebnim Zakonom o Agrokomercu, d.d. koje će donijeti Parlament Federacije BiH.

5. Zadužuje se Općinski načelnik Općine Velika Kladuša da hitno u ime Općine Velika Kladuša, zajedno sa Vladom Unsko sanskog kantona, formira delegaciju i zatraži službeni prijem iste i razgovore sa predsjednikom i potpredsjednicima Federacije BiH, sa Visokim predstavnikom u BiH i u drugim meritornim domaćim i međunarodnim institucijama radi neposrednog upoznavanja istih sa aktuelnim stanjem u i oko Agrokomerca, d.d. i mogućim posljedicama koje mogu izazvati pogrešne odluke i indolentan odnos vlasti prema ovom nekadašnjem privrednom gigantu i ljudima koji su za njega vezani. Također, hitno zahtijevati vanrednu sjednicu Strateškog tima, na temu aktuelnih događaja u Agrokomercu, d.d.

6. Općinsko vijeće Općine Velika Kladuša poziva Sud BiH, Općinski sud u Velikoj Kladuši i Sud za ljudska prava u Strazburu da, zbog teškog stanja u i oko Agrokomerca, d.d. agonije koju proživljavaju njegovi radnici i dioničari i zbog daljnjih pogubnih posljedica po budućnost i perspektivu Agrokomerca, d.d. stave u prioritet rješavanje tužbe koje je kod njih u ime dioničara podnijelo Udruženje za zaštitu prava nezaposlenih dioničara Agrokomerca, d.d. koje su od velikog uticaja na rješavanje statusa Agrokomerca, d.d. i ostvarivanje prava dioničara i trajnih ulagača.

7. Tražimo od Vlade Federacije BiH da prekine donošenje odluka i konkretne aktivnosti na privatizaciji Agrokomerca, d.d. do izricanja pravomoćnih presuda Suda za ljudska prava u Strazburu, Suda BiH i Općinskog suda u Velikoj Kladuši po tužbama koje su istima podnijeli dioničari i koje su od presudnog značaja za

utvrđivanje strukture vlasništva u Agrokomercu, d.d.

8. *Tražimo od menadžmenta Agrokomerca, d.d. da u okviru svojih zakonom dozvoljenih prava i obaveza poduzme mjere kako bi na osnovu valjane dokumentacije osporavalo sva potraživanja koja se pojavljuju pred sudom na imovinu Agrokomerca, d.d.*

9. *Općinsko vijeće Općine Velika Kladuša poziva sve radnike i dioničare Agrokomerca, d.d, sve građane Velike Kladuše, Krajišnike, Bosance i Hercegovce, sve dobronamjerne ljude, političke subjekte i institucije da daju svoju podršku i doprinos u odbrani Agrokomerca, d.d. od potpunog uništenja pred kojim se nalazi i njegovom konačnom stavljanju u funkciju zapošljavanja, razvoja i napretka ovoga kraja i njegovih građana.*

10. *Zadužuje se Općinski načelnik i predsjedavajući Općinskog vijeća da putem resorne Službe za informisanje o održanoj raspravi, donesenim Zaključcima Općinskog vijeća i daljnjim aktivnostima informiraju meritorne domaće i međunarodne institucije, te domaću i međunarodnu javnost s ciljem pronošanja istine o stanju u Agrokomercu, d.d. i dobivanja podrške za njegovo spašavanje.*

II

Ovi Zaključci stupaju na snagu danom objavljivanja u „Službenom glasniku Općine Velika Kladuša“.

OPĆINA VELIKA KLADUŠA
OPĆINSKO VIJEĆE

PREDSJEDAVAJUĆI
OPĆINSKOG VIJEĆA
Sejfo Mustafić

Broj: 01-05-108/2009
Velika Kladuša, 04.05.2009. godine
